

欽定剿平粵匪方略

欽定勦平粵匪方略卷三百九十四 甲子年

十月初一日 戊辰 徐宗幹奏言江西廣昌石城一

帶逆匪悉竄瑞金踞壬田寨羅坑口等處爲巢

穴環徧汀隘八月初六日署汀州鎮總兵關鎮

國率將弁擊勦獲勝斬馘甚多該逆不敢復窺

各隘仍屯踞瑞金縣境張運蘭所部湘勇已陸

續抵汀一俟到齊卽出境兜勦並與康國器一

軍遙爲聯絡兼顧甯化武平各縣以杜分竄汀
屬邊防似尙周備惟探聞湖州敗匪於八月十
八九等日由徽境竄入浙省開化華埠至江常
一帶閩省建邵邊隘又復戒嚴臣飛催總兵林
文察於九月初七日督帶親軍壯勇到省令由
延平赴建甯暫駐探明何處喫緊馳往迎擊並
令署建甯鎮總兵袁良選派弁兵聽候調度至

林文察前因赴調延緩奏奉

諭旨交部議處茲該總兵而稱重洋風水阻滯非敢
有意遲延現既星馳赴防可否

飭部免議出自

聖恩奏入

上諭曰著卽飭令張運蘭等分道嚴密遏剿務將股
賊盡殲勿令擾及完善林文察被叅赴調延緩處

分著加恩寬免

同日喬松年奏言逆匪竄踞楚境麻羅蘄廣處
處喫緊皖軍稍可騰出兵力自應分撥出境會
剿除蔣凝學一軍業經調赴蘄水外臣已飛飭
劉連捷督率所部卽日拔隊前往蘄羅會合剿
辦至潛山太湖宿松一帶距賊甚近本尙空虛
所有朱洪章朱南桂兩軍應令扼守太湖兼顧

聞

潛宿其李榕王可陞兩軍卽進紮潛山以爲朱
洪章等後路並防黃梅廣濟竄賊英霍等處仍
責成英翰郭寶昌張得勝何紹彩等軍防守奏
入報

初四日 辛未 左宗棠奏言 臣查明咸豐十一年浙

省失事武員酌其情罪重輕分別定擬所有已

革前署處州鎮總兵台州協副將特保兩次失陷處州府城雖經規復咎無可辭已革前杭州協副將王邦慶於杭城初次失守時保守內城旋催援軍隨同克復又先後克復天台台州府縣兩城並新昌縣城著有微勞惟不能力扼兇鋒省城被陷後復失守嶺防功不掩過該二員業經革職應請

旨發往軍臺效力贖罪前代辦撫標中軍參將衢州
城守營都司林奎於省城失陷本屬罪無可寬
惟係暫代人員並未接印且在省督造火藥與
帶兵防剿者不同應請

旨革職免其治罪已革前提標中軍參將博忠當甯
波府城失陷時曾經受傷並無棄城先遁情事
又隨同克復鎮海甯波府縣兩城及餘姚縣城

尚知愧奮業經革職應請

旨免其治罪奏入

上諭內閣曰咸豐十一年閒浙江省城失守各屬相繼淪陷失事文職各員業經分別懲辦其失事武員自應按律定擬各該員或兩次失陷城池咎無可辭或著有微勞功不掩過或暫代人員並未接印或隨同攻克並復鄰封情節不同應分別重輕

各當其罪所有已革前署處州鎮總兵台州協副將特保已革前杭州協副將王邦慶均著發往軍臺效力贖罪前代辦撫標中軍參將衢州城守營都司林奎著革職免其治罪已革前提標中軍參將博忠著免其治罪

初六日癸酉曾國藩奏言湖北大股賊匪由麻城

羅田東竄經六安守將蔣凝學率隊擊敗賊乃

轉趨英山與蘄水另股竄匪會合圍偏城壘蔣
凝學屢戰獲勝先後俘斬解散以數千計賊於
九月初閒退竄楚境適英翰郭寶昌擊敗霍山
賊由六安以達英山蔣凝學奉湖廣督臣之檄
亦卽由英山赴援羅田而賊之徧擾蘄水蘄州
廣濟黃梅者正入太湖西境聞劉連捷朱南桂
等軍已抵太湖亦悉數退竄鄂疆至浙賊入皖

延擾徽郡自唐義訓金國琛等軍敗賊於鎮口
等處死者降者十之六七餘賊踰歙嶺而逸經
唐義訓等出嶺追勦竄入浙江遂安縣境我軍
追及斬三百餘級解散千餘人賊橫竄馬石橋
山豐口小路陷開化華埠據報漏逸而西者不
過數千現在皖北皖南一律肅清惟湖北賊勢
尙趨重蘄水廣濟等縣皖北日前肅清未可深

集賢堂
侍臣已添調各軍扼堵太湖潛山宿松英霍等處以防回竄而皖南之賊竄入江西則節節皆有重兵餘匪竄楚不能復擾皖境所有皖南諸軍如易開俊唐義訓劉松山金國琛等防剿多年艱苦備嘗應先行開列額懇

恩施以昭激勸其餘出力員弁可否彙入擊退竄賊

各案內容臣奏保出自

鴻施

同日沈葆楨奏言汪海洋悍黨自許灣敗散後
尙餘四五萬竄伏瑞金又收合餘燼回撲甯都
九月初八九等日晝夜猛攻署參將石玉署知
州郭毓龍等督同紳民登陴固守斃賊千餘我
勇傷亡亦以百計勢甚危急鮑超率所部由池
埠倍道赴援十一日該逆分三路出偏官軍營

壘賊陣林立山岡鮑超指揮諸將分路應敵賊
逆拌死衝突我軍五路齊進敗其前隊譚勝達
唐仁廉等軍奮力衝殺左右兩路之賊先後潰
退周有勝等直搗中堅馬隊各軍橫截直衝賊
勢不支我軍追至山下圍殺方酣忽另股從山
巔壓下拌命搏鬪適譚勝達等乘勝馳至斷其
歸路賊遂大潰我軍追殺四十餘里當將吳口

渡張連湖坑山港烏林壩等處賊巢悉數踏平
積屍盈野十二日督隊進抵甯都州平城外數
十里立解城圍石玉等領兵練隨同追勦共斃
賊萬餘名生擒二千餘名內有僞朝將王金瑞
等賊目一百二十四名均於軍前正法我軍陣
亡員弁十人男丁百餘名臣查鮑超以萬餘衆
疊摧巨敵立解重圍固全腹地不少應如何獎

勵之處出自

聖裁所部將領員弁勇丁請

飭下曾國藩查明優保以作士氣其固守危城尤爲
出力之署甯都州事捐升知府郭毓龍等應先
行開列懇

恩獎勵其餘官紳勇練可否容臣擇尤請獎出自
鴻施陣亡遊擊牟占魁等十員懇

恩飭部從優議卹以慰忠魂

沈葆楨又奏冒據席寶田稟稱湖逆由陳坊分
股黃汶英率六七千人向光澤洪芒玕挾幼逆
率四五千入向瀘溪九月初四日會於新城向
橫村而遁席寶田督軍晝夜緊追初九日及之
於廣昌之唐坊白水嶺等處擒斬多名該逆退
踞古嶺憑險堅拒遊擊夏基鴻外委廖生達斬

關而入力戰死之我軍奮勇齊進賊棄嶺狂奔
席寶田揮大隊偪之賊分黨四散各營亦分隊
搜剿席寶田自率輕騎疾進生擒僞千王洪芒
玕僞招王黃汝英並斬僞鳳王等會初十日追
至高田墟復生擒僞天將等百餘名老賊七八
百名羣賊千餘名殺斃三千餘名解散數千名
餘黨竄入閩界數不滿千十一日我軍復追擒

四五百名訊據供稱漏網之會惟僞主將羅逆王逆耳幼逆實未入閩境也十二日各營搜獲幼逆左右僞侍御列王數十百名石城縣知縣曾繼勳亦督鄉團搜獲僞卹王洪荅政席寶田提訊羣酋咸稱佑逆李遠繼已殞於陣幼逆洪幅瑱或謂死於亂軍或稱自經山僻臣查幼逆親黨已悉數就擒斷難獨脫惟須得實在下落

方釋羣疑至黃汶英前准左宗棠咨業經浙軍
擊斃嗣據張岳齡稟稱斃於廣豐此次席軍所
擒是否黃汶英尙須研訊明確查此股悍賊經
席寶田盡力窮追苦戰五晝夜翦除殆盡殊屬
異常勤奮可否仰懇

天恩准予開復降補知府處分仍以按察使

記名簡放並

賞還布政使銜勇號所部將士可否容臣擇尤請獎
出自

逾格鴻施陣亡遊擊夏基鴻外委廖生達懇請

飭部從優議卹以慰忠魂

沈葆楨又奏言據署龍南縣知縣蔣如琳等稟
稱南雄之賊竄犯龍南縣境該縣文武統帶兵
勇迎擊八月二十五日賊由插株坳嶺巔繼擁

而下外委羅玉雲督勇衝殺斃賊數十名該逆
斜趨水西由犁頭背渡河蔣如琳搶赴河干斬
登岸之賊數百名槍斃溺斃無數賊之後隊復
由下游偷渡守備范應龍迎頭截擊蔣如琳橫
截其腰擊斃五六百名生擒僞王蘇喜等並
長髮賊二百餘名餘黨向定南廳境竄去查該
縣文武紳民同心殺賊力保危城洵堪嘉尙謹

將尤爲出力之署龍南縣事卽補同知直隸州
知州蔣如琳守備范應龍先行開列懇

恩獎勵其餘出力員弁紳勇可否容臣擇尤請獎出
白

逾格鴻慈

同日兩廣總督毛鴻賓署廣東巡撫郭嵩燾奏
冒江西逆匪由信豐關入南雄進偈州城經南

詔道唐啟蔭飭總兵易榮華等分路出擊疊獲
勝仗斃匪甚多賊由東南竄去臣等以該逆不
能逞志於南雄難保不由他道竄粵已先飭接
壤江西各州縣集團堵禦並飛咨提臣崑壽募
勇千名派委妥員相機堵剿八月二十六日賊
由江西之龍南竄入和平龍川境內幸各縣均
已有備沿途堵截賊遂橫竄嘉應州界之長田

和平龍川交界之下車等處已飛飭都司銜鄭
紹忠由龍南馳赴連平與提臣所派之常秀各
軍聯絡截擊補用知府吳贊誠與副將方耀一
軍扼紮州界防堵賊漸由香藤坳等處回竄武
平查江粵交界路路可通兵勇不敷分布實有
防不勝防之勢須得聲威較重之大員督率調
度提臣崑壽現駐惠州該處爲東江門戶一時

未能輕離臬司李福泰老成精幹在粵年久熟悉情形現添派兵勇遴選得力員弁令該臬司督率出省自副將以下俱聽調遣以一事權而資鎮率另委湖南副將沈玉遂督帶水師並派已革都司黃連元管駕巡船駛往惠州河面嚴密布置以爲陸師聲援再據惠潮嘉道鳳安等稟稱八月二十九日賊衆萬餘由江西安遠長

甯竄入平遠縣境副將方耀派兵迎剿衆寡不敵賊遂直撲縣城知縣吳炳綬嬰城固守三十日率民團山城擊賊中槍墮馬賊衆大至縣城不守臣等飛飭臬司李福泰潮州鎮總兵翟國彥嚴督兵勇合力進攻並飭各營四面兜剿勿徒以收復縣城了事

毛鴻賓郭嵩燾又奏言現在金陵收復江浙藩

平祇此餘匪延喘於江粵之交斷難久稽顯戮
惟侍逆李侍賢等皆百戰之餘非烏合可比若
不及早殲滅恐死灰復燃關繫東南全局現在
江西兵力厚集賊勢萬難久駐則竄楚竄閩竄
粵惟其所便而邊防之單又爲賊意所注無過
粵東者目前竄入之匪不過萬餘堵剿已形棘
手探聞瑞金信豐諸大股動輒六七萬駸駸跟

蹤而入其勢恐難再支粵省餉絀兵單非一時
所能補救臣等通籌全局時切憂惶竊計賊匪
一日不滅粵東不能一日休息江西湖南不能
一日撤防卽東南各省亦不能遂稱安枕與其
糜經費於防堵何如合羣力以殲除江楚兵力
極厚餉源亦裕若僅防堵本境以鄰爲壑似非
朝廷登民衽席之心可否

飭下江西撫臣沈葆楨令王文瑞一軍由贛南一帶
長驅入粵會合惠潮各軍以剿東江之賊湖南
撫臣惲世臨令趙煥聯一軍由桂陽桂東入粵
會合南韶各軍以遏北江之衝臣等仍嚴飭粵
省各軍跟蹤兜剿務期殄此殘寇毋遺後患

毛鴻賓郭嵩燾又奏言粵東帶兵籌餉在在需
人查有廣西候補道王承澤戰功卓著四川候

補知府曾紀鳳熟悉戎機現均請假在籍合無
仰懇

天恩飭下湖南巡撫檄令該員等剋日馳赴廣東交
臣等差遣委用實於軍務有裨均奏入

上命議政王軍機大臣傳諭曾國藩左宗棠毛鴻賓
沈葆楨徐宗幹惲世臨郭嵩燾曰英霍之賊退竄
鄂疆徧竄蘄水蘄州等處皖北雖暫就肅清未能

恃以無恐現在湖北軍情喫緊著曾國藩懍遵疊
次諭旨飭令劉連捷迅卽赴援湖北其皖楚交界
地方仍責令朱南桂等嚴密防守毋任回竄皖南
之賊走遂安陷開化漏逸而西者尙有數千人由
江竄楚竄粵頭頭是道曾國藩仍當飭令易開俊
金國琛等跟蹤出境追勦務須數省合力將此股
殘匪殄除淨盡未可以鄰爲壑致令死灰復燃鮑

超援甯都血戰解圍已降旨賞戴雙眼花翎沈葆
楨卽傳知該提督益圖奮勉將漣侍等逆悉數誅
鋤肅清江境用副委任席寶田一軍翦除湖逆搜
獲僞干王洪芑珩等多名據生擒賊供祐逆李遠
繼已殞於陣幼逆洪幅瑱或謂死於亂軍或稱自
經山僻俱屬渺茫不定僞主將羅逆王逆亦俱漏
網恐遺孽復萌再有勾結又形費手著沈葆楨卽

飭席寶田等確切查明幼逆所在認真搜捕以淨
根株左宗棠徐宗幹亦當督飭各路地方將領嚴
密捕拏爲一勞永逸之計南雄賊犯龍南經知縣
蔣如琳等督勇擊斃甚多餘匪竄定南廳此處與
廣東地方交界著毛鴻賓郭嵩燾飭令地方文武
嚴防竄越並派兵出境追剿以免再有闖入沈葆
楨仍當責令地方文武員弁認真防剿如賊勢尙

衆卽酌量抽調數營前往會同粵軍合力勦洗正
在寄諭閒據毛鴻賓等奏匪撲南雄州城官軍迎
擊疊勝賊趨東路現飭臬司督兵出省防勦又賊
由江西安遠長甯竄入平遠縣城等語南雄賊匪
被擊退竄復由江西之龍南竄入和平龍川境內
幸各縣均有準備遂橫竄嘉應州界之長田和平
龍川交界之下車等處毛鴻賓等已飛飭鄭紹忠

由龍南馳赴連平與崑壽所派之常秀各軍互爲
聯絡並令知府吳贊誠等扼紫州境防剿著卽催
令李福泰籌添兵勇統帶出省赴南雄一路妥籌
剿辦毋令匪蹤紛竄並嚴飭方耀等軍迅行規復
平遠縣城粵東江西湖南犬牙相錯粵東一日不
得肅清江西湖南卽一日不能安枕著沈葆楨卽
飭王文瑞一軍由贛南一帶長驅入粵會合惠潮

各軍以剿東江之賊惲世臨卽令趙煥聯一軍由桂陽桂東入粵會合南韶各軍以遏北江之衝均須剋日赴援不得稍分畛域致誤戎機毛鴻賓等當飭令李福泰先就現有兵力迅圖剿辦不可坐待客兵遷延時日廣西候補道王承澤四川候補知府曾紀鳳現在是否在湘著惲世臨檄令該員等剋日起程赴粵交毛鴻賓等差遣委用以資得

力

上諭內閣曰官軍擊賊出境皖北皖南肅清仍著曾國藩督飭各軍乘勝追剿迅殲醜類務絕根株在事尤爲出力之安徽壽春鎮總兵易開俊著交軍機處記名遇有提督缺出請旨簡放署皖南鎮總兵唐義訓著開復革職留任處分皖南鎮總兵員缺卽著該員補授總兵劉松山著給予一品封典

前布政使銜湖北安襄鄖荆道降補同知金國琛
著開復道員原官其餘出力員弁並著曾國藩彙
入擊退竄賊各案內奏請恩施

上又諭內閣曰鮑超一軍自入江後連獲大捷所向
有功此次馳援甯都以萬餘衆疊摧巨敵立解重
圍固全腹地實屬謀勇兼優深堪嘉許鮑超著加
恩賞戴雙眼花翎以示優異其所部將領員弁勇

丁並著曾國藩查明保奏候旨施恩此次固守危城尤爲出力之署甯都州知州捐升知府郭毓龍著以道員留於江西補用代理參將甯都營守備石玉著以遊擊留於江西儘先補用並賞加副將銜守備賴永福著以遊擊留於江西儘先補用並賞換花翎千總馬成香著以都司留於江西儘先補用並賞換花翎候選知縣郭爲蕃著以知縣卽

選並賞戴花翎已革玉山縣知縣馬榮甲著俟
糧處分開復後賞換花翎其餘官紳勇練著沈葆
楨擇尤保奏以示鼓勵陣亡之遊擊牟占魁安徽
卽補都司洪龍海都司曹志本洪潮海都司銜守
備鍾世名守備張明坤把總譚尙德外委杜賢才
楊國友儘先外委高凱風均著交部從優議卹以
慰忠魂

上又諭內閣曰湖逆洪柱珩等由新城敗遁經席寶田等力追數百里苦戰五晝夜翦除殆盡辦理甚爲得手席寶田著開復降補知府處分仍以按察使記名簡放並賞還布政使銜勇號其餘出力員弁著沈葆楨擇尤請獎陣亡之遊擊夏基鴻外委廖生達著交部從優議卹以慰忠魂南雄股匪竄擾龍南縣境該縣文武各員統帶兵勇迎擊擒斬

多名在事出力之署龍南縣知縣蔣如琳著賞戴
花翎守備范應龍著賞換花翎其餘出力員弁著
沈葆楨一併擇尤奏請獎勵

毛鴻賓郭嵩燾又奏言臣等前因平遠縣屬之
八尺墟地方關繫緊要派令副將方耀帶勇駐
紮詎該副將於八月下旬私回潮州補募勇丁
遂致被賊闖入雖緣勇丁不敷堵禦事屬有因

惟私自離營以致軍無統帥爲賊所乘實屬咎
有應得應請

旨將副將方耀暫行革職責令帶罪立功以贖前愆
奏入得

旨方耀著暫行革職責令帶罪立功以觀後效儻再
不知奮勉卽行從嚴叅辦

初八日 乙亥

上命議政王軍機大臣傳諭僧格林沁官文曾國藩
富明阿吳棠李鴻章曰前諭曾國藩調派劉連捷
等軍赴楚助剿疊據奏報業經陸續到皖劉連捷
一軍已由官文檄調赴鄂此起官兵皆係曾國藩
舊部卽鄂省水陸各營亦係楚勇居多若得曾國
藩前往調度則兵將相習必可收指臂之效現在
江甯已臻底定軍務業經藏事卽著曾國藩酌帶

所部前赴皖鄂交界督兵剿賊務期迅速前進勿
稍延緩第恐曾國藩之兵由東路進偪賊必避兵
西竄武漢一帶防守亦關緊要官文俟曾國藩到
後卽可回駐省垣會同吳昌壽妥籌防範並將各
營餉需源源接濟毋令缺乏僧格林沁深入楚境
難保賊匪不伺隙竄擾北路著酌量情形扼要駐
紮力顧豫疆賊或北竄卽著督率馬步迎頭夾擊

以期聚而殲旃僧格林沁官文曾國藩均係威望
素著似此三面扼紮必能將此股賊匪悉數殲除
剋期蕝事至江南甫經肅清所有撫輯地方一切
事宜均須妥爲籌辦李鴻章著前赴江甯暫署總
督篆務曾國藩俟李鴻章到後卽行交代起程江
蘇巡撫著吳棠暫行署理並著迅速起程赴蘇富
明阿著兼署漕運總督所有淮徐一帶防守事宜

卽著妥籌兼顧應否移紮清淮並著富明阿斟酌
情形奏明請旨至李鴻章籍隸安徽該省係總督
兼轄固應迴避惟此時軍情緊要不能不權宜變
通李鴻章著毋庸奏請迴避卽行前往江甯接替
以便曾國藩迅速出省曾國藩李鴻章皆係朝廷
有功之臣素能不分畛域此時雖係暫時任事於
應剿應防一切機宜均當以大局爲重力戒滿盈

不可稍涉大意以副委任

欽定勦平粵匪方略卷三百九十五 甲子年

十月初十日 丁丑 喬松年奏言楚逆屬聚蘄羅前

經派撥各軍防勦現探圍攻成大吉之賊經蔣
凝學帶兵會合成大吉諸軍連日分勦獲勝業
已解圍賊匪南竄蘄州劉連捷一軍日內即可
拔隊前進英山潛太等處仍飭在防各軍加意
嚴防毋稍疏懈奏入報

十一日 戊寅 僧格林沁官文奏言逆衆自趨斬水

後大股麕聚梅子山等處延袤八九十里與蔡

家河踞匪互爲犄角 臣等通籌全局亟應楚豫

夾擊並嚴防江西絕其旁竄以期聚而殲旃 臣

僧格林沁議由斬水陸路親督馬步各軍節節

進剿 臣官文並令楚軍陸師均歸 臣僧格林沁

調遣以厚兵力現值秋深水涸江湖之防較前
喫重水師戰守機宜仍歸臣官文調度所有蘄
州茅山渡等處沿江要隘及蘭溪下巴河糧道
飛檄各水師加意嚴防疊據各營稟報九月初
十日賊犯田家鎮洋橋均經水師擊敗步賊欲
撲龍坪亦經擊散該逆退向蘄州之下壩會合
大股依山盤踞十三十五十六等日賊在下湖

廟一帶圖犯湖邊水師又擾彭司橋及小爛泥
灘等處旋復竄犯土門均經師船擊退賊遁西
湖觜一帶臣官文以內湖水勢日涸礮船恐難
得力先飭譚仁芳率步隊扼紮蘄州與水師相
輔而行據報十六日行抵蘄州敗賊於西湖觜
追至冷水井易家沖而同至蘭溪屢被賊撲臣
官文令李明惠所部步隊會同總兵張啟基水

師扼防壘次擊賊獲勝該逆退踞鄧家畝意圖
偷渡復經師船擊退二十一日賊於黃篴湖西
岸沿山築壘以大股突撲李明惠後營李明惠
親帶勇丁會合張啟基水師擊退副將楊秀琪
奮勇殺賊中槍陣亡臣官文以該逆屢次窺伺
江湖水面當將留防襄河湏口小河口一帶礮
船調赴下游歸張啟基分布防剿並派李成謀

陸師扼防下巴河七里鋪唐協和陸師移紮黃岡縣東湖而以輔水師之不逮又飭沿江州縣稽查渡口並令都司熊星源等督率礮船在襄河岳口以下及府河小河口石牌一帶分段梭巡力杜竄越至成大吉及飛虎等營前在白蓮河被賊圍裏嗣經蔣凝學破圍入援力扼蔡家河與成大吉聯絡一氣二十日力解重圍斬擒

及解散者甚多二十一日與楊朝林梁洪勝併
力勦洗連捷於關口等處據探該逆分股敗遁
一竄太湖一竄廣濟成大吉等軍已由蘄州之
張家塆進勦藍斯明等馬步隊由廣濟跟追皖
師劉連捷等軍已抵太湖乘此軍威奮力夾擊
當可迅奏膚公惟英山一路尙屬空虛臣官文
已咨商臣僧格林沁酌撥數營防賊回竄以備

不虞所有陣亡副將楊秀琪應請

飭部從優議卹以慰忠魂奏入

上命議政王軍機大臣傳諭僧格林沁官文曾國藩
曰蕪水逆衆被剿窮蹙分竄廣濟太湖自應乘勝
會剿以期聚而殲旃卽著僧格林沁督飭成大吉
等馬步各軍跟蹤追擊劉連捷等軍已抵太湖並
著僧格林沁曾國藩飭令迎頭會剿迅奏膚公第

逆匪既經陸軍剿擊下游又有皖軍攔截當此秋
深水涸沿江沿湖各要隘尤應嚴密堵禦以防搶
渡官文務當督率水師梭巡防範遇賊卽擊毋得
稍有疏虞英山一路防守尙屬空虛著僧格林沁
酌撥數營嚴防回竄陣亡副將楊秀琪著交部照
副將陣亡例從優議卹

同日沈葆楨奏言逆匪自甯都敗後回踞瑞金

鮑超率師連日追勦擒斬極多九月十五日馳抵瑞金該逆前股入城死守後股背城而陣經鮑超督軍擊敗城賊驚惶開西南門而遁當將縣城克復城外賊壘一律踏平追至距城三十餘里之莖田直達閩界始行收隊計擒斬長髮五六千人乞降解散者不計其數餘賊由武平山路潛遁該署提督已知會閩省防軍一體截

勦臣仍飭各屬加意嚴防以杜回竄查總超統
師入江冒暑血戰平許濟七十餘壘攻克金谿
瀘溪南豐新城力解甯都重圍削平瑞金踞逆
東南大局深資保障應如何

優加恩獎伏候

聖裁其所部將領員弁兵勇可否

飭下會國藩破格請獎出自

天恩

沈葆楨又奏言據席寶田稟稱九月十三日在
高田擒獲僞尊王劉慶漢訊供後凌遲處死以
幼逆尙無蹤跡移軍石城派知縣謝蘭階訓導
唐家桐分帶小隊會同石城縣知縣曾繼勳四
山搜捕二十五日遊擊周家良獲之荒谷並獲
李秀城次子李其詳請解省確訊等情竊念洪

幅瑱黃口小兒無足介意惟洪秀泉竊號十餘
年流毒十餘省遺孽猶在剽竊姦巨慙倚其名
號足以揮召羣兇李侍賢汪海洋等股東西奔
竄方欲得幼逆以冀死灰復燃當幼逆遁至廣
昌去濂逆已閒不容髮幸席寶田晝夜窮勦追
至石城鮑超援甯都克瑞金使濂逆無可容足
而幼逆輾轉荒谷卒就生擒東南大局從此底

定所有尤爲出力之按察使席寶田應如何

優加恩獎出自

聖裁遊擊周家良等先行開列懇

恩獎勵其餘出力員弁勇丁可否容臣擇尤請獎出

自

逾格鴻施洪幅瑱應否檻送京師李其詳年僅四歲
應否飭令解省監禁俟及歲時照例辦理均請

旨遵行

沈葆楨又奏冒南雄之賊闌入定南廳境八月
二十六日直薄城下署同知寶鴻儀調集兵勇
登陴守禦復選精壯縋城出伏前後夾擊該逆
敗竄黃沙口天花寺等處寶鴻儀招集鄉團分
投迎擊斬馘多名賊擾大竹園復經都司姚元
盛等四路設伏約會兵團奮擊賊屍枕藉前後

斃逆會甚多餘匪向廣東和平遁去廳境一律
肅清查該廳官紳同心殺賊力保危城洵堪嘉
尙所有尤爲出力各員應開列懇

恩獎勵其餘官紳弁勇可否容臣擇尤請獎出自
逾格鴻施

同日署福建福甯鎮總兵林文察奏言臣於七
月三十日督所部內渡抵泉接撫臣徐宗幹來

函囑臣赴省隨於九月初一日自泉起程初七
日到省與撫臣面商機宜探報江西敗匪竄至
雲際關汀邵邊防喫緊臣卽於十二日拔隊啟
行馳赴汀邵一帶相機迎勦以期迅掃餘氛
同日徐宗幹奏冒邵汀官軍會同江西各軍擊
退瑞金竄匪後據探該逆繞竄廣東平遠鎮平
大埔等縣勢將闌入閩境窺伺漳龍臣飛檄漳

州鎮道及龍巖文武加意嚴防並飛咨署陸路
提臣林文察趕緊折回擇要籌防旋據興泉永
道鄧廷枏稟稱九月初九日賊由大埔小路竄
至永定十四日直犯漳郡或稱失守或稱未失
現飭委員確探並籌辦守禦等情查瑞金城賊
據報已退竄雩都地方汀邵邊界仍須嚴防關
鎮國應留守汀隘康國器仍駐防光邵均未可

遠離臣已派員各路確探一面檄飭署督標副將郭什春帶領兵勇二千馳往泉州並飛催林文察星夜折回督同進剿飭調魏喻義迅速移師策應張運蘭督帶所部湘勇由閒道疾趨會剿臣再當察看情形親自出省督辦現在浙江全省肅清江西廣東官軍甚衆賊勢似以閩省有閒可乘趁勢竄入臣已飛咨督臣左宗棠卽

派浙營得力將官統帶勁旅星馳來閩策應均
奏八

上命議政王軍機大臣傳諭左宗棠毛鴻賓沈葆楨
徐宗幹郭嵩燾林文察曰瑞金踞賊經官軍擊走
後繞竄廣東平遠鎮平大埔等處闖入閩境窺伺
龍巖直犯漳郡徐宗幹已飭郭什春帶兵勇二千
馳往泉州並調魏喻義張運蘭作速進剿卽著督

飭各軍乘新竄之賊喘息未定一鼓殲除毋任延蔓閩省兵力較單全浙現已肅清左宗棠檄飭得勝之軍星馳赴閩協力進擊迅殄賊氛漳郡是否失守著徐宗幹確查具奏林文察著相機進剿毋稍遲緩鮑超攻克瑞金仍著督軍出境會合閩省防軍將此股敗匪追捕淨盡以竟全功所部將領員弁兵勇著沈葆楨咨明曾國藩保奏候旨施恩

並嚴飭各屬加意嚴防以杜逆匪回竄幼逆被擒
已諭令卽在江西省城凌遲處死李秀城之子李
其詳著俟及歲時照例辦理現在粵省之賊由大
埔竄入閩境其嘉應等處賊勢如何平遠縣城是
否收復前調之王文瑞趙煥聯兩軍著毛鴻賓郭
嵩燾飛咨江西湖南分飭該員等迅速入粵助剿
並嚴飭李福泰等將各處竄匪節節掃蕩以期底

定東南全局

上諭內閣曰幼逆洪幅瑱一犯前於江甯攻克時據
擒賊供稱該逆積薪自焚嗣據左宗棠探明洪幅
瑱實已潛蹤逃竄疊經諭令各路跟蹤兜拏該逆
被官軍追剿屢次敗衄由安徽廣德逃往浙江湖
州復出竄安徽甯國昌化績溪自浙江遂安一帶
遁入江西廣豐瀘溪官軍沿途躡剿追及於廣昌

石城地方將各逆會斬馘殆盡幼逆尙未就擒席
寶田一軍移紮石城派員帶隊搜拏九月二十五
日遊擊周家良於石城荒谷中將洪幼逆拏獲該
犯雖係洪秀泉之子而么膺小醜漏網餘生亦不
值檻送京師著沈葆楨卽將洪幅瑱在江西省城
凌遲處死以快人心沈葆楨自簡任江西巡撫籌
防籌勦深合機宜浙皖賊匪屢次竄入江西均經

調派兵勇次第掃蕩轉危爲安並生擒首逆殲除
各巨酋實屬勲勞懋著加恩著賞給一等輕車都
尉世職並賞給頭品頂戴署浙江提督鮑超前在
江楚皖三省勦賊卓著戰功此次督軍入江所向
大捷雕勦東西兩路疊摧巨股連克堅城斬馘解
散不下十餘萬賊衆聞風膽落遂能盡掃逆氛膚
公立奏鮑超前因江甯克復甯都解圍先後賞給

一等輕車都尉世職賞戴雙眼花翎加恩著錫封
一等子爵以示優異記名按察使席寶田帶兵追
賊疊獲勝仗並將首逆捕滅奮勇可嘉加恩著賞
給雲騎尉世職並賞穿黃馬褂遊擊周家良搜獲
洪幅頊等會甚爲得力加恩著賞給雲騎尉世職
仍免補參將以副將儘先補用並賞給猛勇巴圖
魯名號知縣謝蘭階陳寶箴均著免選本班以同

知直隸州知州不論雙單月卽選並賞戴花翎遊
擊龔繼昌屈德茂魏玉彩均著免補參將以副將
儘先補用龔繼昌並賞給果勇巴圖魯名號屈德
茂並賞給敢勇巴圖魯名號魏玉彩並賞給壯勇
巴魯圖名號都司陳柏貴著免補遊擊以參將儘
先補用並賞加副將銜守備唐本有著免補都司
以遊擊儘先補用並賞加參將銜訓導唐家桐著

免選本班以知縣留於江西補用知縣曾繼勳著
以直隸州知州升用並賞換花翎其餘出力員弁
兵勇著沈葆楨擇尤保獎候旨施恩

上又諭內閣曰閩浙總督兼署浙江巡撫左宗棠督
師入浙恢復浙東各郡縣進規浙西攻克杭州省
城及湖州等府縣肅清全浙並派兵截剿皖南竄
賊蕩平巨股卓著勳猷茲當効逆洪幅瑱就擒殲

除餘孽東南軍務漸次底定自應渥加懋賞左宗
棠著加恩錫封一等伯爵浙江布政使蔣益澧隨
同左宗棠統兵入浙身先士卒所向無前先後力
拔堅城廓清浙境懋著戰功並著加恩賞給騎都
尉世職以示渥沛恩綸至意

上又諭內閣曰定南官紳擊賊獲勝該廳境內肅清
勦辦尙屬得手所有尤爲出力之署定南廳同知

寶鴻儀著賞戴花翎儘先都司姚元盛著以遊擊
留於江西儘先補用其餘出力官紳著沈葆楨查
明擇尤請獎

十三日 庚辰 左宗棠奏旨逆賊李侍蕢汪海洋兩

股疊經江西官軍剿敗然黨夥甚衆時出江粵
邊界昨接福建撫臣徐宗幹函稱瑞金踞匪擊
退後賊之入粵者復由大埔翻山竄犯汀屬陷

武平縣城張運蘭轉戰失利賊卽分股竄陷龍
巖南靖並陷漳州府城徐宗幹現調林文察回
扼泉州臣查漳州龍巖失陷汀州所屬亦徧地
賊氛北與延平永春毗連南與廣東潮嘉接壤
現在江西瑞金會昌尙有賊踞關鎮國駐汀州
康國器駐邵武兩軍均難撤動徐宗幹調泉廈
各處官兵六七千人分防興泉並通永春等處

兵單力薄殊爲可虞臣飛飭提督黃少春副將
劉明珍兩軍由衢州取道浦城赴邵武一帶接
防以便騰出康國器全部進剿漳州並飭援江
各軍除王德榜王開琳仍留吉安防剿外劉典
一軍卽由建昌取道赴汀惟此兩路由江浙邊
界赴閩山徑崎嶇深恐緩不濟急現在賊踞漳
州有下趨之勢省垣爲根本重地興泉兩郡爲

省城門戶不可稍涉疏虞當飭提督高連陞率所部馳赴甯波雇坐輪船由海道先赴福建省城察賊所向相機迎剿以期穩固臣俟各軍拔行後卽擬進駐衢州就近調度如局勢必須急進當赴閩親督諸軍迅速剿辦惟浙省係臣兼署一切善後事宜猶須次第經理臣旣赴閩勢難兼顧應請

飭下新任撫臣馬新貽速赴本任接辦以重職守馬
新貽未到任以前臣如出省所有浙江巡撫篆
務可否卽交藩司蔣益澧護理伏候

訓示遵行

左宗棠又奏言接據署福建莆田縣知縣吳光
漢稟報漳州府城被匪闖入焚掠九月十五日
仍退往龍巖臣惟漳州賊退尙屬得自傳聞而

龍巖與粵東毗連各處均爲賊踞閩省軍情仍屬喫緊所有三路入閩官兵應仍星馳前進俾速戡定奏入

上命議政王軍機大臣傳諭左宗棠毛鴻賓徐宗幹沈葆楨郭嵩燾曰江西逆衆由廣東大埔翻山竄犯汀屬武平縣境張運蘭轉戰失利賊分股陷龍巖南靖入漳州府城徐宗幹調林文察回扼泉州

左宗棠飭提督黃少春副將劉明珍由衢州取道
浦城赴邵武一帶接防以便替出康國器全部進
剿漳州劉典一軍由建昌赴汀該督恐緩不濟急
已飭高連陞由海道赴福州省城相機迎剿並擬
進駐衢州就近調度催新任巡撫馬新貽赴任所
籌均尙周妥已諭令馬新貽卽赴浙省矣浙省接
辦善後各事亦關緊要萬一閩省軍情緊急馬新

貽一時未能赴浙卽令蔣益漣暫行護理仍隨時兼顧以期無誤漳州踞匪是否退往龍巖各該府州縣等城文武如何下落均著左宗棠徐宗幹查明具奏龍巖與粵東毗連各處俱爲賊踞閩省軍情萬分喫緊著左宗棠催令派出各軍並親督官軍速籌進剿張運蘭一軍雖小有挫失左宗棠徐宗幹仍當督飭該臬司激勵將弁以期再整軍威

閩省被賊闖入連陷數城徐宗幹何以先事毫無
準備如再有疏失自問當得何罪毛鴻賓沈葆楨
等於賊匪竄出境外何以不令諸將跟追畛域分
明以鄰爲壑非同心禦侮之道著卽飭令在事員
弁出境窮追會同閩浙諸軍協力剿洗淨絕根株
其瑞金等處踞匪及南雄一帶竄匪仍著各該督
撫認真搜剿勿留餘孽

上又命議政王軍機大臣傳諭曾國藩喬松年馬新
貽曰逆賊李侍賢等股由廣東大埔翻山竄入閩
境撲陷武平縣城張運蘭進剿失利賊卽分股竄
陷龍巖南靖並陷漳州府城汀州所屬徧地賊氛
左宗棠現調援江之劉典一軍由建昌取道赴閩
計已起程前進惟江西瑞金會昌一帶尙有賊踞
現在僅留王德榜王開琳兩軍在吉安等處防剿

兵力恐不敷分布且竄閩之賊被閩浙粵東諸軍
兜剿難保不回竄江境著曾國藩飛飭鮑超一軍
乘勝越境會剿務將入閩賊匪就地殲除毋得稍
存畛域之見貽誤戎機左宗棠因閩省賊蹤紛擾
擬親赴衢州調度暫令蔣益澧護理浙江巡撫前
因曾國藩已赴江甯諭令馬新貽仍留安慶辦理
善後事宜此時左宗棠移紮衢州恐須親督諸軍

入閩勦賊馬新貽身膺浙撫責無旁貸著卽將安
慶應辦善後各務與曾國藩會商揀派大員接辦
卽由曾國藩迅速飭赴安慶以便馬新貽交替起
程劉典一軍調赴閩省皖南防勦事宜並著曾國
藩喬松年妥籌會辦江西瑞金會昌踞匪並由曾
國藩會商沈葆楨督飭諸軍迅卽殲除毋任旁竄
十四日辛巳徐宗幹奏言據石碼通判馬珍等稟

報漳州龍巖永定武平各城先後被匪竄入等
情查張運蘭甫到汀防聞武平喫緊卽帶兵前
往堵截詎該逆被江軍追勦繞由廣東大埔闌
入閩境並將張運蘭一軍衝斷分股直驅疊陷
數城勢甚猖獗必須厚集兵力方能會合剿除
林文察已由上游折回省垣臣與面商機宜於
九月二十五日統領各軍添募壯勇迅赴漳龍

相機進剿臣仍飛咨督臣左宗棠統帶得力之師星馳來閩會辦並飛咨江西撫臣沈葆楨酌撥附近閩省一路官兵前來援應至失事各處文武俟查明是否先期逃避並實在下落另行辦理臣調度無方應請

旨先行交部從嚴議處奏入

上諭曰漳州等處被陷情形昨據左宗棠奏到當經

諭令該督撫嚴飭派川諸軍及張運蘭所部速籌防剿著卽懍遵前旨與左宗棠隨時籌商妥辦如再有疏失卽惟該撫是問徐宗幹自請嚴議之處著暫行寬免

徐宗幹又奏言臣應卽出省督剿惟龍巖州漳平等縣與永春德化毗連距省甚近省垣根本重地守禦之策須同英桂籌備萬全妥爲布置

並添調隨帶官兵再行定期啟行奏入

上諭曰福建省防緊要徐宗幹著仍駐紮省垣與英桂將防剿事宜妥籌辦理勿稍鬆懈

同日喬松年奏言探報楚境逆匪經僧格林沁擊敗東竄太湖延及霍山臣已飛飭劉連捷折回太湖堵剿其霍山一路令英翰郭寶昌何紹彩等分投夾擊並飭張得勝一軍由流波礮拔

赴霍境迎頭截剿兼顧六安李榕王可陞兩軍
赴潛霍交界兼顧潛山皆與英翰等軍前後會
合三路兜剿毋任竄擾仍飭朱南桂所部八營
嚴守宿松以防廣濟之賊僧格林沁督軍追剿
現已進駐英山臣思賊蹤飄忽一日數變臣相
距較遠常恐鞭長莫及已將劉連捷等營分布
地方呈明僧格林沁以備酌量調派臣仍激勵

各軍嚴行防剿奏八

上諭曰著卽督飭諸軍遇賊卽擊均歸僧格林沁節制仍隨時與曾國藩會商妥辦皖北各路防務不准稍涉疏懈

十六日癸未沈葆楨奏計開福建漳州龍巖武平

永定先後失陷軍情萬緊省防單薄人心驚惶撫臣徐宗幹若坐鎮省垣則前敵諸軍無所統

攝若帶兵出省又慮根本重地過於空虛現在
全浙肅清邊防鞏固可否仰懇

天恩飭令閩浙督臣左宗棠剋日入閩督辦以慰民
望而固軍心奏入

上命議政王軍機大臣傳諭左宗棠沈葆楨曰閩省
賊氛甚熾著左宗棠催令派出各軍迅速起程赴
閩剿賊該督行抵衢州就近體察閩省軍情如果

十分緊急卽行移軍直入閩境相機督剿迅掃逆氛江省主客各軍共計七萬有餘續又添募勇丁爲數不少此時軍務較鬆正可騰出兵力赴閩會剿沈葆楨酌度情形何處兵勇可以抽撥卽派令得力員弁統帶赴閩鮑超一軍該撫亦可就近咨催入閩毋得稍分畛域所有援閩各軍均歸左宗棠調遣以一事權江省防務仍著沈葆楨妥籌兼

顧勿令賊匪得以回竄

沈葆楨又奏言據席寶田將僞干王洪芒玕僞
卹王洪芒政僞招王黃汶英派員解省臣親提
隔別研鞫均各供認不諱洪芒政蠢然一物於
賊中情形不甚了了黃汶英貌甚英鷲質之干
逆卹逆均稱確係其人當時浙中及廣豐誤報
陣斃者實緣得其僞印之故其言洪逆內政昏

亂各酋擁兵自衛情形甚悉洪玘玐羣兇渠魁
洪逆謀叛實伊愆惡已未以後僞政歸其掌握
流毒江浙幾無孑遺所有該逆等應如何辦理
之處請

旨遵行奏入

上諭內閣曰本年自江甯湖州克復後漏網悍逆洪
玘玐洪玐政黃汶英等窮蹙奔竄疊經官軍跟蹤

追捕將該逆等擒獲訊取供詞洪芒珩尤爲羣兇
渠魁十數年來流毒江浙等省生靈塗炭實堪痛
恨著沈葆楨卽將洪芒珩洪芒政黃汶英三犯就
地凌遲處死以快人心

沈葆楨又奏旨署甘肅臬司劉于潯秉質素弱
歷年辦理軍務備極辛勞以致舊疾增劇今歲
八月撫郡防務稍鬆請假赴省就醫嗣因湖逆

入江復力疾赴撫此次旋省益憊不能支稟求
代奏請開署缺理合據情轉奏伏乞

聖鑒訓示奏入

上諭內閣曰署甘肅按察使劉于潯著准開署缺仍
在江西帶兵勦賊以資得力

十七日甲申徐宗幹奏冒據總理凱字老湘營務

道員張恆祥稟報臬司張運蘭於九月初十日

聞武平警信帶勇救援次日逆衆來撲立時擊退詎月股從旁抄出我軍衆寡不敵傷亡甚衆張運蘭受傷落馬經親勇救出復被賊衝散未知下落臣查張運蘭身經百戰從無挫折此次因後隊阻留粵境兵力過單以致失利必須得力大員接統所部以資應援查張恆祥久歷戎行所有張運蘭一軍卽令暫行統帶一面查明

該臬司實在下落另行具奏奏入報

聞

同日

上命議政王軍機大臣傳諭曾國藩李鴻章曰前經諭令曾國藩駐楚皖交界督師剿賊該大臣諒已部署起程嗣復據喬松年奏蘄水等處之賊回竄霍山太湖等境僧格林沁已至英山誠恐賊衆逐

漸深入皖南北防不勝防必須就地殄除方可一
勞永逸李鴻章現已至江甯辦監臨事務即可就
近照料一切以便曾國藩督師出省前因左宗棠
須赴衢州辦理閩省軍務曾經諭令馬新貽迅赴
浙江省城安慶省垣尤須大員駐紮應派何員前
往接替之處並著迅速具奏

十九日

丙戌

曾國藩奏言金陵派援皖北之劉連

捷朱南桂朱洪章三軍先經官文調赴鄂省會
勦臣檄令三軍同進並添調易開俊由皖南率
隊渡江與李榕王可陞等同爲後路策應乃部
勒甫定而鄂事旋鬆羅田蘄水之賊已由潛太
橫竄霍山皖疆又形喫緊臣以軍事瞬息千變
不特臣相距七百里不宜遙制卽官文喬松年
相距約五百里亦難一一懸斷因函致馬新貽

請其就近酌量調度無論在鄂在皖總以劉連捷等軍力當前敵以王可陞等軍保固後路各軍銀米子藥皆取給於安慶糧臺與馬新貽息息相通凡官文喬松年有所調度亦請馬新貽與之往返函商庶節節靈通無彼此兩歧之患

奏八

上諭曰馬新貽已飭赴浙江巡撫新任其安慶省城

應如何另派大員駐紮調度之處著該督妥籌辦理

二十日丁亥僧格林沁官文奏言自我軍敗賊於

新洲集該逆東趨風火山等處盤踞臣僧格林

沁於九月二十日督馬隊進紮竹瓦店常星阿

藍斯明等移紮朱店成保陳國瑞等進紮團陂
二十二日分西北兩路進剿獲勝奪賊壘多處

該逆屬集包龍廟列仗回拒翼長恆齡等各率
馬隊由中路進攻該逆翻山向蘄水一帶潰竄
是日斃賊數百名解散無數二十三日臣官文
到竹瓦店晤商機宜以賊蹤奔竄靡定江防固
須嚴密仍當遏截西北以防越嶺回竄臣官文
卽日回營督飭水師慎防江面臣僧格林沁次
日督隊進紮新店地方兼催各路步隊進剿探

得該逆分股一竄蘄州之曹家河一竄蘄水以
東之陳家壩將趨皖境遂飛咨撫臣喬松年嚴
飭官軍實力扼截前後夾擊一面令常星阿等
追勦曹家河竄匪臣僧格林沁督帶恆齡成保
等馬步各隊跟追東竄之賊二十六日至陳家
壩探報賊蹤漸趨東北當札飭英翰郭寶昌等
各帶所部於英山扼要堵勦成大吉等管帶所

部跟蹤尾追二十七日成大吉等敗賊於青石
嶺等處該逆翻山分竄一向東北潛太一路一
向正北英山一路遂飭成大吉等追剿東北竄
匪臣僧格林沁督帶成保陳國瑞等馬步各隊
繞赴英山分東西兩路橫出堵剿北竄之賊十
月初二三等日成保等在英山以東追殺賊匪
數百名解散不少初四日追至土漠河四路悍

賊齊來撲犯經我軍擊敗殲斃八九百名生擒數百名初五日探得賊勢將趨霍山恐其西竄則流波磳一帶正當其衝總兵張得勝之軍未免單薄遂飭駐古佛堂之何紹彩等拔隊迅赴流波磳會同張得勝實力堵剿並催英翰郭寶昌各帶步隊向霍山一路速進橫截臣僧格林沁督帶恆齡等馬隊隨後繼進初六日英翰郭

寶昌追至樂兒嶺擒斬甚多先是英翰等敗賊
於陶家河等處有匪目黃中庸率衆千人來降
初七日我軍至黑石渡英翰等令黃中庸襲取
賊營而陳得才馬融和邱元才等股漫山遍野
直撲我軍英翰等督隊迎擊擒斬數百名將賊
截爲兩段臣僧格林沁亦督帶馬隊趕到賊勢
窮蹙邱元才率黨向正北麻埠奔竄僞將溫其

玉等及夥黨九千餘人投械乞降因人數過衆
須妥爲安插速解其勢當飭英翰等酌留二三
千人令爲前敵立功贖罪其餘酌給川資遣散
回籍偵知逆首陳得才馬融和等俱在管家渡
一帶麴聚僞端王藍城春在五歧河一帶盤旋
當飭成保英翰等各帶所部分投進剿初九日
馬融和率黨七萬餘來營投誠願爲前敵初十

日僞將甘懷德等亦誘擒僞端王藍城春山獻
率黨五千餘投誠當將藍城春訊明凌遲梟示
以申

國法而快人心曉諭降衆痛改前非遣散回籍馬
融和緩死留營令誘擒逆首陳得才並招撫逆
黨以孤其勢仍隨時察看該降日如尙懷異志
卽按軍法從事聞陳得才伏匿英霍潛太一帶

已飛咨喬松年飭各處防兵一體搜拏至何紹
彩張得勝等由流波磴追賊至桑樹衝擒斬多
名該逆前股已過麻埠北竄後股賊酋汪侍第
率衆數千投誠薙髮遣散並據張得勝稟報追
剿至商城東北僞將邱元才率衆乞降當飭該
總兵等確查如果真心悔罪准予投誠又據蔣
凝學稟報賊至英山屬之長嶺菴地方僞將吳

青泉等率黨萬餘投誠當經札飭該道留千餘
名驅之前敵其餘遣散現在大夥陸續來降者
不一而足統計各營接仗擒斬數千受降十數
萬人前後遣散降衆已分咨湖廣安徽河南陝
西各督撫嚴飭沿途地方官分起遞解原籍妥
爲安插毋使滋事臣僧格林沁統兵在黑石渡
暫紮以資鎮撫俟稍有端緒再行酌量緩急撥

兵助勦惟常星阿等於九月杪追賊至廣濟東
南遇伏失挫蕭河清力戰陣亡官兵亦多陣歿
臣僧格林沁飛咨官文確查接應不力各員據
實彙辦現在該逆上竄蔡家河一帶意圖回擾
黃麻難保不比犯豫疆已飛飭常星阿等整隊
繞出賊前堵截並撥成大吉之軍由英山折回
楚省會勦毋令西趨豫省兵力單薄先令成保

陳國瑞等帶領馬步隊取道商城向光州一帶
扼紮並函會國瑞選帶馬隊駐紮光州以杜北
竄已革提督馬德昭業經到營現札令幫同成
保營帶步隊認真追剿至成保陳國瑞桂錫楨
自夏及今大小數十戰英翰郭寶昌橫出截擊
使賊匪喪膽紛紛乞降洵屬異常出力除英翰

甫蒙

簡任藩司不敢再請

獎敘外總兵郭寶昌等開列懇

恩獎敘已革副都統成保應如何給獎之處出自

天恩奏入

上命議政王軍機大臣傳諭僧格林沁官文國瑞喬
松年張之萬吳昌壽曰賊經官軍擊敗後向東狂
奔官文嚴防水路僧格林沁督軍追擊成保陳國

瑞等奮力截勦殲斃無算震懾軍威畏罪乞降者
不下十數萬衆該親王公忠素著數日之間獲此
奇捷覽奏深爲嘉悅降衆過多恐首鼠兩端之輩
不免久而生心著僧格林沁暫駐黑石渡妥爲鎮
撫以防反側其有籍可歸者自應妥爲安置俾安
生業沿途經過各地方尤須認真彈壓方不致滋
生事端著官文吳昌壽喬松年張之萬嚴飭所屬

地方妥籌辦理陳得才尙在逃未獲著僧格林沁
督飭各軍實力搜拏該犯現在踰伏英霍潛太一
帶著喬松年嚴飭在防諸軍一體兜剿儘堵遏不
力任令脫逃查由何路竄走卽惟何路防兵是問
常星阿等追剿南竄股匪遇伏失挫蕭河清力戰
陣亡官兵亦多陣歿殊堪憫惜接應不力之員著
該親王會同官文查明叅辦陣亡員弁著查明請

卹現在此股賊衆若干人著僧格林沁查明具奏
逆衆旣圖上竄回擾黃麻難保不北犯豫疆該親
王已令成保陳國瑞向光州一帶扼紮以杜北竄
並著國瑞選帶馬隊馳往光州會同張之萬督飭
防軍奮力扼剿馬德昭現已到營卽著札令幫同
成保管帶步隊以資差遣

上又命議政王軍機大臣傳諭惲世臨曰本日據僧

格林沁等奏官軍剿賊疊獲大勝各股匪衆窮蹙
乞降現擬陸續遣散遞籍已分咨湖廣等省督撫
妥爲安插等語降衆大半被賊裹脅現旣投誠反
正自應分別遣散惟其中良莠不齊若不妥籌安
置難保不別滋事端著惲世臨於該降衆等遣回
過境時飭令所屬地方官酌給口糧分別遞回原
籍妥爲安插認真約束毋稍大意

上諭內閣曰官軍勦匪屢獲勝仗各股匪窮蹙乞降
統計十數萬人勦辦甚爲得手仍著僧格林沁等
督率所部奮力擊勦毋留餘孽所有尤爲出力之
總兵郭寶昌著賞穿黃馬褂陳國瑞著開復降三
級調用暫停開缺處分都司桂錫楨著免補都司
以遊擊儘先補用先換頂戴已革副都統成保著
仍以副都統記名簡放